

MUSTAFA RUMANI

BIBLIOTEKA  
SHTETIT

85H-1  

---

R 94

NE ATO  
MALE  
DHE  
BREGORE



RAPSODIKE



VARGJE



814-1  
1294

MUSTAFA RUMANI

NË ATO MALE DHE BREGORE

*Vargje rapsodike*



SHTËPIA BOTUESE «NAIM FRASHËRI»

Tirazhi 1000 kopje

Format 70x100/32

Stash: 2204-72

---

KOMBINATI POLIGRAFIK, Shtypshkronja e Re  
Tiranë, 1976

## RILINDASVE

Kujtojmë rilindasit tanë  
për dituritë që na dhanë  
dhe porositë që na lanë  
për të ndriturë vatanë.

Kujtojmë ata atdhetarë  
që nga goja nxorën ar  
për kombin shqiptar  
dhe gjuhën që t'vij mbarë.

Kujtojmë Hoxha Tasimin,  
Avdul, Saminë e Naimin,  
që përhapën përparimin,  
shkollat shqipe dhe arsimin.

Andon Zakon dhe të tjerë,  
që ishin burra me vlerë,  
me lavdi edhe me nder,  
që s'harrohen asnjëherë.

## NAIM FRASHËRIT

Nuk do të harrohet Naimi,  
gojëmjalti e gjuhë bilbili,  
patrioti e zemërtrimi.

S'harrohet ky vjershëtar,  
ky i flaktë atdhetar  
që ligjëroi me mall.

Që këndoi për lirinë,  
Bagëtinë e Bujqësinë.  
Skënderbeun e trimërinë.

Vjersh' e tija mori dhenë,  
drit' e shpres' për mëmëdhenë  
të fiton' lirinë e nderë.

## O JU TRIMA TË DËGJUAR

Çerçizi me gjith' Mihalë<sup>1)</sup>  
ishin dy trima të rrallë,  
Bajrami me Hito Labnë<sup>2)</sup>  
bimbashin turk e vranë.

Viti nëntëqint e tetë  
kapetan Çerçizi vetë  
doli maleve me çetë,  
me trimat e tij me fletë.

Te rrapi në Mashkullorë  
vazhdoi lufta dhjetë orë,  
trimat me armë në dorë  
luftuan me një taborr.

Trimat e Çeços me famë,  
s'e lëshuan istikamë,  
nam në Mashkullorë lanë  
nder i madh ish për vatanë.

---

1) Mihal Gramenoja

2) Bajram Pergji dhe Hito Labi, shokë armësh të Çerçiz Topullit. Vranë bimbashin turk në Gjirokastër.

## VITI 1911

Nëntëqint e njëmbëdhjetë  
Rreme Rushiti me çetë  
nëpër kodra, nëpër brigje,  
nëpër kreshta, nëpër shtigje.

Në Qaf' të Smartës te qarri  
krisi pushka, u ndez zjarri,  
u ngren' djemt' e Shqipërisë  
në luftë kundër Turqisë.

Muharremi trim me fletë  
mbi armikun vret e pret,  
për të ruajtur vatanin  
luftoi dhe me junanin.

Bamatat, nën Delvinë  
luanët zunë pusinë,  
djemtë trima t' arbëreshit  
Konispol' e Kurveleshit.

Shovinistët me luft' i prinë  
përmbi ta bënë kërdrinë;  
iknë ata të gjakosur,  
porsi derrat e zgjebosur.

Morën rrugën tatëpjetë,  
rruku-rruku, ran' në det,  
të mundur, të shpartalluar,  
fund e krye të dërrmuar.



## NË VITIN DYMBËDHJETË

Në vitin dymbëdhjetë,  
në nëntor njëzet e tetë  
dielli shpërndau retë.  
Ismail Qemali vetë  
çau male, çau det,  
erdh në Vlorë, në qytet.

Patriot Ismail Qemali  
mendjelarti, zemërzjarri  
për liri i digjej xhani,  
shpëtimtar e pat vatani,  
shpresat popullit i ngjalli.

Në zemër të Shqipërisë  
nga çdo anë e nga çdo vis  
u mblodh lulja e burrërisë,  
u ngrit flamuri i lirisë,  
u hoq zgjedh' e robërisë,  
u bë shpallja e pavarësisë.

## KY VITI 1914

Ky viti katërmbëdhjetë  
s'ka për t'u harruar lehtë,  
në histori do të mbesë.

Shovinistët e Greqisë  
hyn' në jug të Shqipërisë,  
dogjën fshatrat e kufisë.

Fshati im mbeti i shkretë,  
tymi i zi mbuloi retë,  
nga mali ikën kopetë.

Dhe dy gra plaka që mbenë,  
Merushja me Merjemenë,  
si qiri në zjarr i trenë,  
të paharruara do jenë.

Ç'inat pati me 'to vallë,  
q'i dogji në zjarr të gjallë?  
Kudo që shkeli barbari  
u dogj vendi u tha bari.

Muharremi<sup>1)</sup> me një çetë  
në çdo fshat shkoi vetë,  
shoi zjarret me të shpejtë.

Patriotin Alush Taka<sup>2)</sup>  
s'e trëmbi zjarri dhe flaka;  
priti sa e zuri nata,

fluturoi e u bë erë  
shkoi te trimat e tjerë,  
bënë luftë të paprerë.

Këta burra patriotë  
i kish rritur kjo tokë,  
i kujton populli sot.

- 
- 1) Muharrem Rushiti, patriot nga fshati Koskë. Së bashku me çetën e tij luftoi kundra shovinistëve grekë.
  - 2) Alush Taka, patriot nga fshati Konispol. Ishte zëvendëskomandant i çetës së Muharrem Kocjotit.

## SELAM MUSAI

Selami nga Salaria  
me gjithë shokët e tija,  
n'ato brigje, n'ato maja,  
i vuri të huajt përpara.

Tejpërtej Malit të Gjerë,  
i la të vrar' e të prerë,  
luftoi ballë për ballë,  
si Skënderbeu me pallë.

Flit' Selami, zemërtrimi,  
u thoshte djemve: Ku jini,  
frikë nga plumbi mos kini,  
të gjallë me dorë i zini.

Dhe në luftën, më njëzetë,  
Selam Musai me çetë,  
sulmoi përpara vetë,  
për në Vlorë, në qytet.

O Selam, zemër me çika,  
n'ato qafa, n'ato gryka,  
breshkaxhinjt' i zuri frika,  
nga sëpata dhe nga thika.

Gunën përsipër e shtrove  
e përmbi tela kalove,  
si shqiponjë u lëshove,  
pipinot seç i tmerrove.

## KUJTON POPULLI SALINË<sup>1)</sup>

Në Sarandë e në Delvinë  
dhe në gjithë atë krahinë,  
në gojë e mbajnë Salinë  
për guximin e trimërinë.

Lart në Delvinë kur doli,  
kapetan Saliu foli,  
pyeti ku është Thimio Loli<sup>2)</sup>,  
në ferra fshehur te gjoli.

Shpejt në Krane arriu.  
Ku të vente Thimio ziu,  
rrotull në ferra si miu,  
nga frika gjaku i ngriu.

---

1) Sali Murati.

2) Thimio Loli, agjent i vjetër, i cili me çetën e tij terrorizonte fshatrat e rrethit të Sarandës.

## LUFTA E VLORËS

Lufta e madhe më njëzetë  
tundi botën si tërmet  
dolën djemt' e arbëreshit  
të luftojn me pallë sheshit.  
U derdh gjaku anembanë  
fyt për fyt me italianë.  
Atje sipër në Kaninë  
po gjëmon e vetëtin  
shqiptarët e bënë fora  
çanin përpara me kordha.  
Sulm, të çlirohet Vlora  
bini, o ju lumtë dora.

## KAPEDAN SALI VRANISHTI<sup>1)</sup>

Sali Vranisht, kapedani,  
i madh të kish dalë nami  
se kishe zemër luani,  
përbrenda të digjej xhani.

Që nga Vlora në Delvinë,  
çdo qytet e çdo krahinë,  
të gjithë e njihnin Salinë  
se luftonte për lirinë.

Sali trimi, Sali kordha  
s'të trembi shiu dhe bora  
në dyfek të rrinte dora  
gjithnjë ia bëje fora.

---

1) Sali Murati nga fshati Vranisht i Vlorës, Hero i Popullit. Luftëtar i shquar për liri. U dallua sidomos në luftën e Vlorës më 1920.



## AVNI RUSTEMIT

O Avni, o trim i rrallë,  
lule, lule, o Avni<sup>1)</sup>,  
në Paris vrave Esanë  
se të kish shitur vatanë.  
Ca të poshtër e zagarë  
të zunë pritë e të vranë.  
Populli i Vlorës ka dalë,  
të ka pritur duke qarë,  
Halim Xhelua guximtar  
pranë varrit tha ca fjalë:  
«Zogu është trathtar,  
hakun kemi për ta marrë.  
Avni, lule e djalërisë,  
ishe shpresë e vegjëlisë —  
ylli i kuq' i lirisë.  
Ty nuk të kemi harruar,  
historia të ka shkruar.

1) Përsëritet pas çdo vargu

## KONGRESIT TË LUSHNJËS

Luft'¹) e Parë e mallëkuar  
Shqipërinë e kish shkretuar  
e kish ndarë e copëtuar.  
Po në ato kohë të liga  
doli Sulejman Delvina  
me burra të tjerë trima.  
Gjer në Lushnjë kanë ardhë  
delegatët nga çdo anë,  
vatanin për ta shpëtuar  
nga armiqtë e djallëzuar,  
që mbi kokë i janë vërvitur  
si zagarë të uritur.  
Shumë vendime janë marrë  
ta marrë vesh bota mbarë:  
— Është një kombi shqiptar,  
— Esat Pasha — trathtar.  
— Breshkaxhinjtë italianë  
Vlorën tonë pse e mbajnë?  
Të largohen sa më parë!

1) Lufta e Parë Botërore (1914-1918).



## TRIMIT TË MALËSISË, BAJRAM CURRIT

Ç'kanë malet që vajtojnë?  
Ç'kanë shpellat që lotojnë?  
S'po e shohin më dragonë,  
për liri ka rënë dëshmor.

O Bajram Curri me famë,  
kudo luftove në ballë,  
nuk e tunde istikamë,  
e mbaje dorën në pallë.

Emri yt ka mbetë i gjallë,  
Bajram, trim i malësisë,  
yll i rrallë i burrërisë,  
luftove kundër Turqisë  
për flamurin e lirisë.  
Luftove kundër Zogollit  
tradhtarit dhe mizorit.  
Bajram, s'të harron Shqipëria,  
lart të ngriti Partia,  
të ka shkruar historia.

## KUR BËRI THIRRJE PARTIA

Kur bëri thirrje Partia  
të çlirohej Shqipëria,  
rroku armët djalëria.

Në ato kodra, në ato male,  
u bë luftë çlirimtare  
nga brigadat partizane.

Çdo krahinë në Shqipëri  
ka luftuar për liri,  
ka të sajën histori.

Dhe liria që u fitua  
nga askush nuk u dhurua,  
por me gjak u pagua.

## DËSHMORIT VELIKO REXHO

Mërkati të lindi, Mëllëzi të tundi,  
trim Veliko Rexho, që s'të mbante vendi.  
Kur u vrenjtën malet e kushtrimin dhanë,  
rërmeve dyfekun dhe veshe gjerdanë.

Fjalën e Partisë, hape anëmbanë,  
nën shembullin tënd, trimat morën malë,  
s'harrohet korriku, drapëri mbet' n'arë,  
ulën kokën lulet për ty, komisar.

Gjëmime dhe sulme pati ajo ditë,  
gjaku ra mbi hekur, sfugjia në mish,  
sulmove në ballë, flakë trimërie,  
mbete në Delvinë, mbete yll lirie.

## LUFTËS SË KONISPOLIT<sup>1)</sup>

Prapa malit Shëndëlli  
në qafa përmbi Lajli,  
erdhën çetat me fuqi,  
shtatë fshatra në kufi  
po luftojnë me gjermanë  
krah për krah me partizanë.  
Për pesëdhjetë e pesë ditë  
u zbardh nata u bë ditë.  
Nëpër male dhe bregore,  
dhe llogore më llogore  
bëhej luftë popullore.  
Luftë nga qielli e nga deti,  
tundej vendi si tërmeti,  
luft' e ashpër e paparë  
në çdo breg e në çdo majë.  
Tym e flakë në çdo anë  
që çuditi gjithë dynjanë.  
Gjermanët panë hatanë,  
shumë prej tyre mbenë vrrarë,

---

1) gusht-shtator 1943

kockat harcave i lanë.  
Disa shokë tanë të mirë  
dhanë jetën për lirinë,  
nuk i harron kjo krahinë.

## DËSHMORËVE TË MURSISË

Vagalat, Mursi e Xarrë  
juve të jeni krenarë  
për trimat që janë vrarë.  
Në male, në Konispol,  
për liri mbetën dëshmorë:  
Vangjel Kalua djal' i hollë,  
Urani Bari shqiponjë,  
Sotir e Kosta Deliu,  
që ishin zemr njeriu:  
Jani Korrua burr' i vuar,  
Lalë Xharrua djal i zgjuar,  
Koçua<sup>1)</sup> me Lonidh Delinë,  
Kost Gërbura suferinë,  
me gjak shkruan historinë.

---

1) Koço Rubija



## ÇETËS SË BREGUT TË DETIT

Ku vate çeta e Bregut,  
ç'u bënë trimat e dyfekt,  
ku janë ata partizanë,  
Zahua me Mitro Xhanë?

Në ato kthesa, në ato brigje,  
në pozicione e në shtigje  
për atdhe ata luftuan,  
jetën për liri dhuruan.

Partia ju ka nderuar  
në lapidar lartuar  
kujtimi juaj i paharruar  
me germa të arta shkruar.

## DËSHMORIT FERIK ÇARÇANI

Ditën që erdhi gjermani<sup>1)</sup>,  
lule, o Ferik Çarçani,  
çetës sonë i erdhi lajmi.  
Partizanët si shigjetë  
iu ngjitën malit përpjetë,  
pararojë ishe vetë.  
N'Konispol' e matanë  
u hodhët përmbi gjermanë.  
Ç'u ndez flaka anembanë,  
me bomba dore i gritë,  
përpara i vutë si dhitë.  
Kur u hodhe mbi llogore  
gjermanët i tmerrove  
por plagë të rëndë more,  
jetën për liri dhurove.

---

1) Konispol, shtator 1943

DËSHMORIT  
MEHMET BEJDO

Qaf' e Cjepurit matanë  
u mbush plot me partizanë  
vendosur në istikamë,  
bëjnë luftë me gjermanë.  
N'ato brinja, n'ato maja,  
binte topi dhe mortaja  
flak' e tym u bë dynjaja.  
Po në luft' mbeti i vrarë  
Mehmet Bejdua, trim i rrallë.  
Mehmet Bejdo, trim i shquar,  
mbete si yll i pashuar.

DËSHMORIT  
SADIK XHEPE

Sadik Xhepe, deli djalë,  
e ngjite përpjetë malë.  
— Fol, moj Qafa e Bekate,  
Sadik Xhepeja ku vate?  
— Doli malit partizan  
për të çliruar vatanë.  
Gjatë sulmit mbi Delvinë  
e dha jetën për lirinë.  
O Sadik, o sypetrit,  
Partizanët të kanë qarë  
edhe hakun ta kanë marrë.  
Atë ditë sa të vrarë  
Në gjermanë e trathtarë!  
Delvina me gjak është larë.  
Sadik fli i qetësuar,  
se Atdheu është çliruar,  
si e kishe ëndërruar.

## TRE DËSHMORËVE NGA SHALËSI

Shalësi me krenari,  
rrëzë malit në një gji,  
vend i bukur mrekulli,  
gjatë luftës për liri  
nxori djem delikalli<sup>1)</sup>.  
Më 21 korriku<sup>2)</sup>  
u godit me zjarr armiku  
në çdo anë tym e flakë  
u vadit toka me gjak.  
Për të çliruar Delvinë  
u vranë ca trima të mirë,  
partizanë nga kjo krahinë.  
Dhe nga Shalësi tre dëshmorë,  
trima të zgjedhur me dorë;  
dy Bajot<sup>3)</sup> nga një shtëpi,  
ishin të dy kushëri,  
Hyseni<sup>4)</sup> djalosh i ri,  
që dha jetën për liri.

---

1) Delikalli — i shkathët, i hedhur.

2) Më 21 korrik 1944 u bë sulmi i partizanëve të grupit IV për çlirimin e Delvinës.

3) Rahim dhe Idriz Bajo, dëshmorë të fshatit Shalës.

4) Hysen Mahmuti.

## DËSHMORIT KOMUNIST SEIT GAÇI

More urdhërin e shkove  
për në Lurë, në veri,  
diversantët të luftoje,  
komisar me dituri.  
Viti në dyzet e pesë,  
muaji dhjetor më dy  
populli ishte në festë  
votonte me krenari.  
Po bandat reaksionare  
hynë brenda në kufi.  
Forcat e Brigadës Parë  
luftuan me trimëri,  
vranë banditët, bënë kërdi.  
Nga ne ra si trim i rrallë,  
Seit Gaçi djal i ri,  
shokëve që u ndodhën pranë  
se ç'u la një porosi:  
«Votoni, shokë, krenarë,  
të rrojë nëna Parti!»

DËSHMORIT  
SELMAN XHALLARI

Në qafë të Likojanit  
luftojnë djemtë e vatanit  
i qëllon topi gjermanit  
mes për mes istikamit.

Partizanët si luanë  
s'e lëshuan istikamë  
Selman Xhallari, or djalë,  
plagë të rëndë ke marrë.

O Selman, ti e dhe xhanë  
për liri e për vatanë,  
emri yt në lapidar  
do ndrisi si yll i rrallë.

## DËSHMORIT MALIQ TENA

Urdhëri nga grupi  
për në dislokim,  
gjermanë e ballista  
sulen me tërbim.  
Në mal të Sminicit  
u bë flak e tym,  
shtatë partizanë  
luftojnë me guxim.  
Gjashtë kanë rënë  
dëshmorë për liri,  
u vra Maliq Tenua,  
një djalosh i ri.  
Po e qajnë shokët  
me lotë në sy.



## LEFTER TALOS<sup>1)</sup>

Në Vurk kush doli i pari,  
Lefter Talua, komisari.

O Lefter, o lule djalë,  
fjalëmbël e zemërzjarr,  
gjithnjë ishe në ballë,  
ishe djalë me dituri  
të mbrujti nëna Parti.

Në Patos me Mustafanë<sup>2)</sup>  
luftuat si dy luanë  
dhëmb për dhëmb me gjermanë.  
Në kala mbetët të vrarë.  
Lefter Talo sypetriti,  
kishe zemër komunisti  
Partia lart të ngriti.

---

1) Lefter Talo, Hero i Popullit

2) Mustafa Matohiti, Hero i Popullit

## KONGRESIT TË PËRMETIT

Kur pranvera buzëqeshi,  
delegat priti Përmeti  
se do të mbahej Kongresi.

Ata ishin shokë tanë,  
sympatrembur, partizanë  
vinin nga vija e parë.

Kongresi kur përfundoi,  
vendimet komunikoi,  
Komitetin formoi.

E mori vesh gjithë bota,  
Kryetar<sup>1)</sup> ish Enver Hoxha,  
trimi që e bëri fora.

Balli dhe Legaliteti  
me gishta në gojë mbeti,  
të përbuzur nga mileti.

Ca të huaj misionarë,  
vinin rrotull si zagarë  
u ikën shpresat që panë.

---

1) Kryetar i Komitetit Antifashist Nacionalçlirimtar.

## FASLLI RAMADANI<sup>1)</sup>

Në një ditë plot hidhërim  
u hap lajmi me nxitim:  
Thanë se na u vra një trim.  
Thanë se u vra kapedani,  
trimi Faslli Ramadani.  
Rreth e rrotull trupit të tija  
roje nderi bën ushtria.  
Te varrezat me dëshmorë  
u mbush sheshi me kurorë,  
për nderim i kanë bërë,  
breshëri pushkësh kanë shtënë.

---

1) Faslli Ramadan Sulo, ish-oficer i Ministrisë së punëve të Brendshme, ra në krye të detyrës në gusht të vitit 1958.

## KOMISARIT MUSTAFA MATOHITI

Nuk dëgjohet më bilbili,  
luani që thosh: Ku jini,  
armikut në kokë i bini,  
frikë nga vdekja mos kini.

O Mustafa Matohiti,  
ti kishe zemër graniti,  
shpirt të zjarrtë komunisti,  
se Partia të kaliti.

Mustafa, o lule djalë,  
i kishe shokët të rrallë,  
o komisari me famë,  
s'ke vdekur po je i gjallë.

Ngrehu, Muço, dhe një herë,  
ngrehu, të shikosh Atdhenë,  
që lulzon me vrull përherë,  
ndrit si dielli në verë.

## KONISPOLIT<sup>1)</sup>

Lart mali e karshi deti  
nëpër qafa është qyteti,  
pararojë në kufi,  
lulëzon me krenari.

Majë kodrës, në Buar,  
si një kopsht i lulëzuar  
janë varrezat me dëshmorë  
që qëndrojnë si kurorë.

Madhështor një lapidar,  
shndrit pors i margaritar,  
flet për luftën partizane  
kundra kuçedrës gjermane.

Sa hije ka Konispoli,  
fush' e madhe gjer te gjoli<sup>2)</sup>  
ullinj dhe agrume mbolli  
drit' e jetë Partia solli.

---

1) Kushtuar kooperativës së zmadhuar «Fitorja e Leninizimit»,  
Konispol.

2) Gjoli i Butrintit.

Tetë fshatra të bashkuar,  
kooperativë e zmadhuar,  
punojnë me gaz e me gara  
të shpërndarë nëpër ara.

## TË DUA, FSHATI IM

Të kujtoj, o fshati im,  
me të madh mallëngjim,  
kur vishe me gjelbërim  
ma mbush zemrën me gëzim.  
Shtëpi të bukura, vilë,  
lule, pemë e trëndelinë,  
sipër mal e poshtë fushë,  
kopshte me fiq e me rrush.  
Plot me vreshta e plot me ara  
çfarë të shikosh përpara;  
uji i ftohët në të hyrë,  
nuk ngopesh duke pirë.  
Po të dalësh lart në brinjë,  
nga çdo anë ndien verinë  
këndon qyqja me bilbilë.  
Po të dalësh nëpër rrëza,  
të kënaq me zë thëllëza.  
Në ata fusha, n'ato ara  
traktori plugon përpara.  
Të gjitha këto mirësi  
I solli nëna Parti.

## SHQIPËRI 30-VJEÇARE

- Ç'kanë malet që bubullojnë?
- Nga sondat që tej i shpojnë  
makinat përsipër shkojnë.
- Ç'kanë fushat që gjëmojnë?
- Janë traktorët që punojnë  
tokat drith' të prodhojnë.
- Ç'kanë kodrat që ushtojnë?
- Janë ushtarët që mësojnë  
shpejt' e saktë të qëllojnë.  
Shqipëria kock' e fortë,  
kala e kuqe në botë,  
yll' i ndritur në Evropë,  
fjal' e saja është top.



## O VUNO, FSHATI ME FAMË

O Vuno, fshati me famë,  
në Himarë ishe bërthamë,  
ishe bazë e Partisë  
për fitoren e lirisë.  
Djemtë e tu, djema me halle  
rrokën armët, morën male  
të luftojnë me dushmanë.  
Trathtarët me gjermanë  
erdhë e të vunë zjarrë,  
shumë trima jetën dhanë  
për liri e për vatanë.  
Zaho Koka<sup>1)</sup> me Kozmanë<sup>2)</sup>  
Llambroja<sup>3)</sup> e shumë të tjerë  
që Vunoi i kish lerë.  
O Vuno, ti dhe më parë  
ke nxjerrë revolucionarë  
të besës dhe atdhetarë,  
gjak në vetull kanë marrë.

---

1) Zaho Koka, Hero i Popullit nga fshati Vuno.

2) Kozma Nushi, Hero i Popullit nga fshati Vuno.

3) Llambro Andoni, Hero i Popullit nga fshati Vuno.

## KRAHINA JONË LULËZON

Kur qëndrova në Muzinë,  
hodha sytë mbi krahinë,  
të madh' e kishe gëzimnë;  
fush' e bukur në Delvinë,  
ferm' e Vurgut gjer në Vrinë  
baz' e fortë për bujqësinë,  
është' hambar për Shqipërinë.  
Atje tej në një luginë,  
pranë fshatit Livinë,  
hydrocentrali «Stalin»  
telat e korentit vijnë  
të ndriçojë vendi ynë.  
Kur hodha sytë nga Stjari  
portokalle bojë ari,  
anekënd jeshilon bari,  
gjelbërim dimër dhe verë  
çelin lulet kurdoherë.  
Që nga Shalësi në Mursi  
vend i bukur mrekulli,  
fush e madhe për çudi,  
portokalle dhe ulli  
të mbushin me krenari,  
edhe kodrat përkarshi,

mbushur me dhën e me dhi.  
Kjo krahinë ka lulëzuar  
me shtëpi, shkolla ndërtuar,  
jeta shumë ka ndryshuar.  
O vëllezër, o vurgarë,  
ç't'i kujtosh kohës së parë  
kur beu të tërhiqte zvarë  
dhe në pun' të merrte xhanë,  
si shushunj' të pinte gjaknë!  
O Parti, o tungjatjeta,  
fjalët i ktheve në vepra,  
të rrosh' sa të jetë jeta!

## HODHA SYTË E SHIKOJ FSHANË

Dola lartë në një majë  
hodha sytë e vështroj fshanë.  
Çfarë të shikosh më parë!  
Shtëpi të reja me radhë,  
kopshte me fiq e me dardhë  
dhe në qendër klub e furrë,  
edhe vatër për kulturë,  
kopsht, çerdhe edhe shkollë  
dyqan e Mapo çdo llojë,  
në darkë po të hedhësh sytë,  
nata të duket si ditë  
gjëmon radioja anembanë  
fjalët e Partisë shpërndan.  
Dhe në fushë e në livadhe  
djem e vajza si sorkadhe  
s'u pushojnë duart fare.  
ku ishim, ku jemi, — thashë,  
zemra seç më doli jashtë.

## KAM ZILI PËR BAGËTINË

Dua të jem bari  
në fshatin tim të ri,  
të vete me bagëti  
me gëzim e krenari,  
në Burime<sup>1)</sup>, në vërri,  
t'i kullos me dashuri  
n'ato pllaja me lajthi,  
t'i kullos lart në mal  
n'ato pllaja mbi Gusht'halë,<sup>2)</sup>  
në faqe të malit Shëndëlli  
atje ku fryn veri;  
ujë të ftohtë të pi,  
te lisat, te Maciani,<sup>3)</sup>  
atje ku ngrihet stani  
ku mërzen bagëtin' çobani.  
N'ato të bukura hije  
të ha e të pi me shije  
fyllit me gaz t'i bije.  
T'i këndoj jetës së re  
plot me gaz e hare.  
Të këndoj për Shqipërinë  
për Enverin, për Partinë.

---

1) Burimet janë kullota kodrinore pranë fshatit Janjar, Sarandë.

2) Gusht' halë është shpat i malit Shëndëlli.

3) Vend me lisa dhe me burime uji në malin Shëndëlli, tek i cili verojnë bagëtia.

## ERDHI PRANVERA

Iku dimri erdhi vera  
lulzoi vendi si ngahera,  
jeshiloi bari në treva,  
manushaqet nëpër ferra.  
Çelin pemët dhe tërfili,  
lëshon gonxhe trëndafili,  
këndon qyqja dhe bilbili  
n'ato pllaja dhe lëndina  
lulëzon vendi trëndelina.  
Po të dalësh n'ato brinja  
do të dëgjohen blegërima,  
dhi e dhen, kecër e qingja.  
Po të dalësh poshtë në fushë  
djem e vajza si arushë,  
punojnë me gaz e gara,  
planin ta kryejnë përpara.  
Lulëzohu, fshati ynë,  
se në krye ke Partinë!

## SARANDA

Buzë detit, rrëzë malit,  
ku vjen er' e portokallit,  
gjëndet lulja e beharit:  
Saranda, shërim i xhanit.

Nga çdo an' gjëmon hareja,  
pallate, shkolla të reja,  
bulevarde dhe bahçera,  
hoteli dhe mjaft të tjera.

Po të dalësh nga Ksamili,  
së pari s'të ngopet syri,  
të kënaq me zë bilbili,  
rritet bari dhe tërfili,  
portokallja dhe ulliri.

Pun' e madhe për çudi,  
ky artist, njeriu i ri  
të ka veshur me stoli.  
Sarandë moj bukuri,  
kush të sheh të ka zili!

## P È R M B A J T J E

Rilindasve .....	3
Naim Frashërit .....	4
O Ju trima të dëgjuar .....	5
Viti 1911 .....	6
Në vitin dymbëdhjetë .....	8
Ky viti 1914 .....	9
Selam Musai .....	11
Kujton populli Salinë .....	13
Lufta e Vlorës .....	14
Kapedan Sali Vranishti .....	15
Avni Rustemit .....	16
Kongresit të Lushnjës .....	17
Trimit të malësisë, Bajram Currit .....	18
Kur bëri thirrje Partia .....	19
Dëshmorit Veliko Rexho .....	20
Luftës së Konispolit .....	21
Dëshmorëve të Mursisë .....	23
Çetës së Bregut të Detit .....	24
Dëshmorit Ferik Çarçani .....	25
Dëshmorit Mehmet Bejdo .....	26
Dëshmorit Sadik Xhepe .....	27
Tre dëshmorëve nga Shalësi .....	28
Dëshmorit komunist Seit Gaçi .....	29
Dëshmorit Selman Xhallari .....	30
Dëshmorit Maliq Tena .....	31



Letter Talos .....	32
Kongresit të Përmetit .....	33
Faslli Ramadani .....	34
Komisarit Mustafa Matohiti .....	35
Konispolit .....	36
Të dua, fshati im .....	38
Shqipëri 30 vjeçare .....	39
O Vuno, fshati me famë .....	40
Krahina jonë lulëzon .....	41
Hodha sytë e shikoj fshanë .....	43
Kam zili për bagëtinë .....	44
Saranda .....	46